

11 MAR 2000

Najib-Pencalonan

NAJIB PERCAYA SEBAHAGIAN BESAR UMNO BAHAGIAN TERIMA NASIHAT MT

SUBANG, 11 Mac (Bernama) -- Naib Presiden Umno Datuk Seri Najib Tun Razak hari ini berkata beliau percaya sebahagian besar bahagian-bahagian Umno yang belum bersidang akan menerima nasihat Majlis Tertinggi (MT) agar jawatan Presiden dan Timbalan Presiden Umno tidak ditandingi.

Menurutnya nasihat yang dibuat itu adalah demi kestabilan parti dan mengembalikan kekuatan Umno di semua peringkat dan bagi mengelakkan sebarang masalah yang boleh melemahkan Umno.

MT dalam mesyuaratnya pada 3 Jan lepas memutuskan supaya Presiden Umno Datuk Seri Dr Mahathir Mohamad dikekalkan pada jawatannya, manakala Datuk Seri Abdullah Ahmad Badawi yang kini menjalankan tugas-tugas Timbalan Presiden dicalonkan untuk jawatan timbalan presiden.

"Kita berharap bahagian akan menerima nasihat MT sebab kita pentingkan kestabilan dalam parti dan memberi peluang kepada Umno untuk memulihkan kedudukannya, supaya Umno akan menjadi parti yang semakin kukuh dan kuat dan tidaklah terdedah kepada masalah dalaman dari segi pertandingan jawatan-jawatan tertinggi," katanya.

Terdahulu Najib yang juga Menteri Pertahanan menyaksikan pertunjukan udara akrobatik pasukan "Patrouille de France" Tentera Udara Perancis di Pangkalan TUDM, di sini.

Najib diminta mengulas keputusan Umno bahagian Tanah Merah yang dalam mesyuaratnya semalam mencalonkan pengerusi perhubungan Umno Kelantan Tengku Razaleigh Hamzah bagi jawatan Presiden dan Timbalan Presiden pada pemilihan parti Mei ini, yang menjadikannya bahagian pertama mencalonkan Razaleigh bagi kedua-dua jawatan itu.

Namun Najib berkata MT sememangnya sedar soal ini adalah satu bentuk nasihat dan setiap bahagian berhak membuat keputusannya sendiri.

Mengulas lebih lanjut keputusan Umno Tanah Merah dan adakah tindakan boleh diambil terhadap bahagian itu, Najib berkata: "Tidak ada tindakan, ia adalah hak mereka. Saya percaya sebahagian besar (bahagian) akan menerima nasihat MT."

-- BERNAMA

RV RON